

四庫全書

集部

欽定四庫全書

集部

御選唐宋文醇卷二十四

詳校官左都御史李綬

主事銜臣徐以坤覆勘

總校官編修臣王燕緒

校對官中書臣孫球

謄錄監生臣王晉

欽定四庫全書

御選唐宋文醇卷二十四目錄

廬陵歐陽修文三

序

帝王世次圖序

後序

外制集序

詩譜補亡後序

集古錄目序

韻總序

蘇氏文集序

梅聖俞詩集序

送徐無黨南歸序

欽定四庫全書

御選唐宋文醇卷二十四

廬陵歐陽修文三

帝王世次圖序

堯舜禹湯文武此六君子者可謂顯人矣而後世猶失其傳者豈非以其遠也哉是故君子之學不窮遠以為能而闕其不知慎所傳以惑世也方孔子時周衰學廢先王之道不明而異端之說並起孔子患之乃修正詩

書史記以止紛亂之說而欲其傳之信也故畧其遠而  
詳其近於書斷自唐虞以來著其大事可以為世法者  
而已至於三皇五帝君臣世次皆未嘗道者以其世遠  
而慎所不知也孔子既沒異端之說復興周室亦益衰  
亂接乎戰國秦遂焚書先王之道中絕漢興久之詩書  
稍出而不完當王道中絕之際奇書異說方充斥而盛  
行其言往往反自托於孔子之徒以取信於時學者既  
不備見詩書之詳而習傳盛行之異說世無聖人以為

質而不自知其取捨真偽至有博學好奇之士務多聞  
以為勝者於是盡集諸說而論次初無所擇而惟恐遺  
之也如司馬遷之史記是矣以孔子之學上述前世止  
於堯舜著其大畧而不道其前遷遠出孔子之後而乃  
上述黃帝以來又詳悉其世次其不量力而務勝宜其  
失之多也遷所作本紀出於大戴禮世本諸書今依其  
說圖而考之堯舜夏商周皆同出於黃帝堯之歿也下  
傳其四世孫舜舜之崩也復上傳其四世祖禹而舜禹

皆壽百歲稷契於高辛為子乃同父異母之兄弟今以  
其世次而下之湯與王季同世湯下傳十六世而為紂  
王季下傳一世而為文王二世而為武王是文王以十  
五世祖臣事十五世孫紂而武王以十四世祖伐十四  
世孫而代之王何其謬哉嗚呼堯舜禹湯文武之道百  
王之取法也其盛德大業見於行事而後世所欲知者  
孔子皆已論著之矣其久遠難明之事後世不必知不  
知不害為君子者孔子皆不道也夫孔子所以為聖人



者其智知所取捨皆如此

王志堅曰困學紀聞攷古編謂歐陽公論二帝三王  
世次差舛發端於杜佑通典按釋例世族譜已有此  
疑則發端乃杜預也



## 後序

予既畧論帝王世次而見本紀之失猶謂文武與紂相去十五六世其繆較然不疑而堯舜禹之世相去不遠尚冀其理有可通乃復以尚書孟子孔安國皇甫謐諸書參考其壽數長短而尤乖戾不能合也據書及諸說云堯壽一百一十六歲舜壽一百一十二歲禹壽百歲堯年十六即位年在位七十年年八十六始得舜而試之二年乃始攝政時舜年三十居試攝通三十年而堯崩

舜服堯喪三年畢乃即位。在位五十年而崩。方舜在位三十三年。命禹攝政。凡十七年。而舜崩。禹服舜喪三年畢。乃即位在位十年而崩。由是言之。當堯得舜之時。堯年八十六。舜年三十。以此推而上之。是堯年五十七。已見四世之玄孫生一歲矣。舜居試攝及在位。通八十二年。而禹壽百年。以禹百年之間。推而上之。禹即位及居舜喪。通十三年。又在舜朝八十二年。通九十五年。則當舜攝試之初年。禹纔六歲。是舜為玄孫年三十時。見四

世之高祖方生六歲矣至於舜娶堯二女據圖為曾祖姑雖古遠世異與今容有不同然人倫之理乃萬世之常道必不錯亂顛倒之如此然則諸家世次壽數長短之說聖經之所不著者皆不足信也決矣

修平生於古人書不輕訾議至其灼見刺謬則反覆申明以詔後世又不憚覲縷間嘗論之馬遷上下千百年以成史記而班固譏其是非頗謬於聖人迄今考其書其所褒貶盖多微辭所以譏切當世語南意北使讀者

自得之未嘗是其所是而非其所非又何以據其文而譏其謬也特所編次多據戰國秦漢間處士游談不經之說雜入孔子論定之六經使金鑰莫辨涇渭不分則其所蔽耳公羊傳曰所聞異辭所傳聞又異辭事隔數世不能以無訛謬雖左氏傳猶或未免況其他乎如史記所載衛公子伋壽爭死乃據左傳詩傳之文謂衛宣公納伋之妻生壽及朔朔與宣姜慙伋於公公令伋之齊使賊先待於隘而殺之壽竊其節以先伋至爭死賊

并殺之先儒信之無疑者乃考其年代則宣公十八年  
納伋之妻而十九年宣公死然則所為壽者朔者雖孿  
生亦俱未周睟安得有愬伋爭死之事乎不特左氏傳  
可疑即二子乘舟之詩亦不知何為作也如是者不可  
枚舉聊附記其一端使後世知孟子云盡信書不如無  
書之為至論也





外制集序

慶曆三年春丞相呂夷簡病不能朝上旣更用大臣銳  
意天下事始用諫官御史疏追還夏竦制書旣而召韓  
琦范仲淹於陝西又除富弼樞密副使弼仲淹琦皆惶  
恐頓首辭讓至五六不已手詔趣琦等就道甚急而弼  
方且入求對以辭不得見遣中貴人趣送閣門使即受  
命嗚呼觀琦等之所以讓上之所以用琦等者可謂聖  
賢相遭萬世一遇而君臣之際何其盛也於是時天下

之士孰不願為材邪顧予何人亦與其選夏四月召自滑臺入諫院冬十二月拜右正言知制誥是時夏人雖數請命而西師尚未解嚴京東累歲盜賊最後王倫暴起沂州轉劫江淮之間而張海郭貌山等亦起商鄧以驚京西州縣之吏多不稱職而民弊矣天子方慨然勸農桑興學校破去前例以不次用人哀民之困而欲除其蠹吏知磨勘法久之弊而思別材不肖以進賢能患百職之不修而申行賞罰之信蓋欲修法度矣予時雖

掌誥命猶在諫職常得奏事殿中從容盡聞天子所以  
更張庶事憂閔元元而勞心求治之意退得載於制書  
以諷曉訓勅在位者然予方與修祖宗故事又修起居  
注又修編勅日與同舍論議治文書所省不一而除目  
所下率不一二時已迫丞相出故不得專一思慮工文  
字以盡導天子難諭之意而復誥命於三代之文嗟夫  
學者文章見用於世鮮矣況得施於朝廷而又遭人主  
致治之盛若修之鄙使竭其材猶恐不稱而況不能專

一其職此予所以常遺恨於斯文也明年秋予出為河  
北轉運使又明年春權知成德軍事事少間發嚮所作  
制草而閱之雖不能盡載明天子之意於其所述而得  
一二足以彰示後世蓋王者之訓在焉豈以予文之鄙  
而廢也於是錄之為三卷予自直閣下倮直八十始滿  
不數日奉使河東還即已來河北故其所作纔一百五  
十餘篇云

徐度曰按歐陽文忠公慶厯制草序曰除目所下率

不一二時已迫丞相出故不得專一思慮工文字以盡道天子難喻之意而還誥命於三代之文又劉原甫侍讀墓誌稱其文章尤敏瞻嘗直紫微閣一日追封皇子公主九人方將下直為之立馬却坐一揮九制凡數千言文辭典雅各得其體由是言之則是除目既下必用是日草詞且不得從容下直而為之也迨元祐初命詞之限已不得如前者之迫翟公巽資政居政和間詞命獨為一時之冠然文思遲澁尤惡

人趣之有趣之者輒默誌其旁故一趣則故遲一日  
有遷延至旬餘者

詩譜補亡後序

歐陽子曰昔者聖人已沒六經之道幾熄於戰國而焚  
棄於秦自漢已來收拾亡逸發明遺義而正其訛繆得  
以麤備傳於今者豈一人之力哉後之學者因迹前世  
之所傳而較其得失或有之矣若使徒抱焚餘殘脫之  
經俵俵於去聖千百年後不見先儒中間之說而欲特  
立一家之學者果有能哉吾未之信也然則先儒之論  
苟非詳其終始而牴牾質於聖人而悖理害經之甚有

不得已而後改易者何必徒為異論以相訾也毛鄭於詩其學亦已博矣予嘗依其箋傳考之於經而證以序譜惜其不合者頗多蓋詩述商周自生民玄鳥上陳稷契下迄陳靈公千五六百歲之間旁及列國君臣世次國地山川封域圖牒鳥獸草木魚蟲之名與其風俗善惡方言訓詁盛衰治亂美刺之由無所不載然則孰能無失於其間哉予疑毛鄭之失既多然不敢輕為改易者意其為說不止於箋傳而已恨不得盡見二家之書



未能徧通其旨夫不盡見其書而欲折其是非猶不盡人之辭而欲斷其訟之曲直其能果於自決乎其能使之必服乎世言鄭氏詩譜最詳求之久矣不可得雖崇文總目秘書所藏亦無之慶厯四年奉使河東至於絳州偶得焉其文有注而不見名氏然首尾殘缺自周公致太平以上皆亡之其國譜旁行尤易為訛舛悉皆顛倒錯亂不可復考凡詩雅頌兼列商魯其正變之風十有四國而其次皆莫詳其義惟封國變風之先後不可

以不知周召王豳同出於周邶鄘出於衛檜魏無世家  
其可考者陳齊衛晉曹鄭秦此封國之先後也豳齊衛  
檜陳唐秦鄭魏曹此變風之先後也周南召南邶鄘衛  
王鄭齊豳秦魏唐陳曹此孔子未刪詩之前周太師樂  
歌之次第也周召邶鄘衛王檜鄭齊魏唐秦陳曹豳此  
鄭氏詩譜次第也黜檜後陳此今詩次第也初予未見  
鄭譜嘗畧考春秋史記本紀世家年表而合以毛鄭之  
說為詩圖十四篇今因取以補鄭譜之亡者足以見二

家所說世次先後甚備因據而求其得失較然矣而仍存其圖庶幾以見予於鄭氏之學盡心焉耳夫盡其說而有所不通然後得以論正予豈好為異論者哉凡補其譜十有五補其文字二百七增損塗乙改正者三百八十三而鄭氏之譜復完矣

修與宋咸書謂經非一世之書其傳之謬非一日之失其刊正補緝亦非一人之所能使學者各極其所見而明者擇焉十取其一百取其十雖未能復六經於無失

然聚衆善以補緝之庶幾不至於大謬可以俟聖人之  
復生又與徐無黨書謂凡今治經者莫不患聖人之意  
不明而為諸儒以自出之說汨之也今於經外又自為  
說則是患沙渾水而投土並之也不若沙土盡去則水  
清而明矣合之此序三者雖若語相牴牾而如五味之  
相和可見修於六經潛心自得之趣而亦可為後世學  
人治經之法也

集古錄目序

物常聚於所好而常得於有力之彊有力而不好好之  
而無力雖近且易有不能致之象犀虎豹蠻夷山海殺  
人之獸然其齒角皮革可聚而有也玉出崑崙流沙萬  
里之外經十餘譯乃至乎中國珠出南海常生深淵採  
者腰絙而入水形色非人往往不出則下飽蛟魚金礦  
于山鑿深而穴遠篝火餵糧而後進其崖崩窟塞則遂  
葬於其中者率常數十百人其遠且難而又多死禍常

如此然而金玉珠璣世常兼聚而有也凡物好之而有  
力則無不至也湯盤孔鼎岐陽之鼓岱山鄒嶧會稽之  
刻石與夫漢魏以來聖君賢士桓碑彝器銘詩序記下  
至古文籀篆分隸諸家之字書皆三代以來至寶怪奇  
偉麗工妙可喜之物其去人不遠其取之無禍然而風  
霜兵火湮沒磨滅散棄於山崖墟莽之間未嘗收拾者由  
世之好者少也幸而有好之者又其力或不足故僅得  
其一二而不能使其聚也夫力莫如好好莫如一予性

顓而嗜古凡世人之所貪者皆無欲於其間故得一其所好於斯好之已篤則力雖未足猶能致之故上自周穆王以來下更秦漢隋唐五代外至四海九州名山大澤窮崖絕谷荒林破塚神仙鬼物詭怪所傳莫不皆有以為集古錄以為轉寫失真故因其石本軸而藏之有卷帙次第而無時世之先後蓋其取多而未已故隨其所得而錄之又以為聚多而終必散乃撮其大要別為錄目因并載夫可與史傳正其闕謬者以傳後學庶益

於多聞或譏予曰物多則其勢難聚聚久而無不散何必區區於是哉予對曰足吾所好玩而老焉可也象犀金玉之聚其能果不散乎予固未能以此而易彼也

歐陽修自記昔在洛陽與余遊者皆一時豪雋之士也而陳郡謝希深善評文章河南尹師魯辨論精博余每有所作二人者必伸紙疾讀便得余深意以示他人亦或時有所稱皆非余所自得者也宛陵梅聖俞善人君子也與余共處窮約每見余小有可喜事



懽然若在諸已自三君之亡余亦老且病矣此叙之  
作既無謝尹之知音而集錄成書恨聖俞之不見也  
悲夫



韻總序

倕工於為弓而不能射羿與逢蒙天下之善射者也奚仲工於為車而不能御王良造父天下之善御者也此荀卿子所謂藝之至者不兩能信哉儒者學乎聖人聖人之道直以簡然至其曲而暢之以通天下之理以究陰陽天地人鬼事物之變化君臣父子吉凶生死凡人之大倫則六經不能盡其說而七十子與孟軻荀揚之徒各極其辯而莫能殫焉夫以孔子之好學而其所道

者自堯舜而後則詳之其前蓋畧而弗道其亦有所不  
暇者歟儒之學者信哉遠且大而用功多則其有所不  
暇者宜也文字之為學儒者之所用也其為精也有聲  
形曲直毫釐之別音響清濁相生之類五方言語風俗  
之殊故儒者莫暇精之其有精者則往往不能乎其他  
是以學者莫肯捨其所事而盡心乎此所謂不兩能者  
也必待乎用心專者而或能之然後儒者有以取焉洛  
僧鑒聿為韻總五篇推字母輕重之法以定四聲考求

前儒之失辯正五方之訛顧其用心之精可謂入於忽  
微若櫛之於髮績之於絲雖細且多而條理不亂儒之  
學者莫能難也鑒聿通於易能知大衍之數又學乎陰  
陽地理黃帝岐伯之書其尤盡心者韻總也世本儒家  
子少為浮圖入武當山往來江漢之旁十餘年不妄與  
人交有不可其意雖王公大人亦莫肯顧聞士有一藝  
雖千里必求之介然有古獨行之節所謂用心專者也  
宜其學必至焉耳浮圖之書行乎世者數百萬言其文

字雜以夷夏讀者罕得其真往往就而正焉鑒聿之書  
非獨有取於吾儒亦欲傳於其徒也

字學所係甚小然韓愈云凡為文宜略識字固亦不得  
而略也既有聲形曲直毫釐之別則必有音響清濁相  
生之類五方言語風俗各殊莫可究詰然必有統宗會  
元之處焉先儒謂聲較色味臭止得其半蓋三者俱兼  
陰陽獨聲止陽數記曰凡聲陽也故至於陰則不能行  
理固然矣然其不能行處即是無聲而無聲之所從來

必有有聲者以為對其對為何聲則反而求之於此雖  
無聲而不異有聲也梵書有華嚴字母能統萬類之聲  
而一一區別之僧鑒聿其精於是者歟





蘇氏文集序

予友蘇子美之亡後四年始得其平生文章遺稿於太子太傅杜公之家而集錄之以為十卷子美杜氏壻也遂以其集歸之而告於公曰斯文金玉也棄擲埋沒糞土不能銷蝕其見遺於一時必有收而寶之於後世者雖其理沒而未出其精氣光怪已能常自發見而物亦不能掩也故方其擯斥摧挫流離窮厄之時文章已自行於天下雖其怨家仇人及嘗能出力而擠之死者至其

文章則不能少毀而揜蔽之也凡人之情忽近而貴遠  
子美屈於今世猶若此其伸於後世宜如何也公其可  
無恨予嘗考前世文章政理之盛衰而怪唐太宗致治  
幾乎三王之盛而文章不能革五代之餘習後百有餘  
年韓李之徒出然後元和之文始復於古唐衰兵亂又  
百餘年而聖宋興天下一定晏然無事又幾百年而古  
文始盛於今自古治時少而亂時多幸時治矣文章或  
不能純粹或遲久而不相及何其難之若是歟豈非難

得其人歟苟一有其人又幸而及出於治世世其可不  
為之貴重而愛惜之歟嗟吾子美以一酒食之過至廢  
為民而流落以死此其可以歎息流涕而為當世仁人  
君子之職位宜與國家樂育賢材者惜也子美之齒少  
於予而予學古文反在其後天聖之間予舉進士於有  
司見時學者務以言語聲偶摘裂號為時文以相誇尚  
而子美獨與其兄才翁及穆叅軍伯長作為古詩詩雜  
文時人頗共非笑之而子美不顧也其後天子患時文

之弊下詔書諷勉學者以近古由是其風漸息而學者  
稍趨於古焉獨子美為於舉世不為之時其始終自守  
不牽世俗趨舍可謂特立之士也子美官至大理評事  
集賢校理而廢後為湖州長史以卒享年四十有一其  
狀貌奇偉望之昂然而即之溫溫久而愈可愛慕其材  
雖高而人亦不甚嫉忌其擊而去之者意不在子美也  
賴天子聰明仁聖凡當時所指名而排斥二三大臣而  
下欲以子美為根而累之者皆蒙保全今並列於榮寵

雖與子美同時飲酒得罪之人多一時之豪俊亦被收  
采進顯於朝廷而子美獨不幸死矣豈非其命也悲夫  
朱子曰范文正招引一時才俊之士聚在館閣如蘇  
子美梅聖俞之徒此輩雖有才望然輕儇戲謔又多  
分流品一時許公為相張安道為御史中丞王拱辰  
之徒皆深惡之求去之未有策而蘇子美又杜祁公  
壻杜是時為相蘇為館職兼進奏院每歲院中賽神  
例賣故紙錢為飲燕之費蘇承例賣故紙因出已錢

添助為會請館閣中諸名勝而分別流品非其侶者  
皆不得與會李定願與而蘇不肯於是盡招兩軍女  
妓作樂爛飲作為傲歌王勝之直柔句云歌倒太極  
遣帝扶周公孔子驅為奴拱辰輩專探伺伊敗闕才  
聞此句即以白上仁宗大怒即令中官捕捉諸公皆  
已散走逃匿而上怒甚捕捉甚峻城中喧然於是韓  
魏公言於上曰陛下即位以來未嘗為此等事一旦  
遽如此驚駭天下觀聽仁宗怒少解而館閣之士罷

逐一空故時有一網打盡之語杜公亦罷相子美除  
名為民永不叙復子美居湖州有詩曰不及雞竿下  
坐人言不得比罪人引赦免放也雖是拱辰安道輩  
攻之甚急然亦只伊輩輕薄做得不是縱有時名所  
為如此終亦何補於天下國家邪仁宗於是懲才士  
輕薄之弊這幾箇承意旨盡援引純朴持重之人以  
愚仁宗凡解經不過如釋訓詁而已如楊安國彭乘  
之徒是也





梅聖俞詩集序

予聞世謂詩人少達而多窮夫豈然哉蓋世所傳詩者  
多出於古窮人之辭也凡士之蘊其所有而不得施於  
世者多喜自放於山巔水涯之外見蟲魚草木風雲鳥  
獸之狀類往往探其奇怪內有憂思感憤之鬱積其興  
於怨刺以道羈臣寡婦之所歎而寫人情之難言蓋愈  
窮則愈工然則非詩之能窮人殆窮者而後工也予友  
梅聖俞少以蔭補為吏累舉進士輒抑於有司困於州

縣凡十餘年年今五十猶從辟書為人之佐鬱其所蓄  
不得奮見於事業其家宛陵幼習於詩自為童子出語  
已驚其長老既長學乎六經仁義之說其為文章簡古  
純粹不求苟說於世世之人徒知其詩而已然時無賢  
愚語詩者必求之聖俞聖俞亦自以其不得志者樂於  
詩而發之故其平生所作於詩尤多世既知之矣而未  
有薦於上者昔王文康公嘗見而歎曰二百年無此作  
矣雖知之深亦不果薦也若使其幸得用於朝廷作為

雅頌以歌詠大宋之功德薦之清廟而追商周魯頌之  
作者豈不偉歟奈何使其老不得志而為窮者之詩乃  
徒發於蟲魚物類羈愁感歎之言世徒喜其工不知其  
窮之久而將老也可不惜哉聖俞詩既多不自收拾其  
妻之兄子謝景初懼其多而易失也取其自洛陽至於  
吳興以來所作次為十卷子嘗嗜聖俞詩而患不能盡  
得之遽喜謝氏之能類次也輒序而藏之其後十五年  
聖俞以疾卒於京師余既哭而銘之因索於其家得其

遺藁千餘篇并書所藏掇其尤者六百七十七篇為一十五卷嗚呼吾於聖俞詩論之詳矣故不復云

王志堅曰歐陽公與梅聖俞由河南幕府締交最久至嘉祐元年始薦為直講距聖俞之死僅五年耳故王荊公挽詩云貴人憐公青兩眸吹噓可使高岑樓坐令隱納不見收空能乞錢助饋餉此為歐公發也然公為作誌又為作序於故人之誼不薄其不早汲引豈無意乎世傳聖俞不得志作一書名碧雲騷以

詆諸公葉夢得嘗辨為魏泰作然於石林燕語載范  
公初貶饒州聖俞作靈鳥賦以寄及公秉政意其援  
已而漠然無意所薦乃孫明復李泰伯聖俞乃作後  
靈鳥賦云我昔閔汝之忠作賦弔汝今主人誤豐爾  
食安爾巢而爾不復啄叛臣之目伺賊壘之去反憎  
鴻鵠之不親愛燕雀之來附清波雜志引聖俞聞范  
公計詩云一出屢更郡人皆望酒壺俗情那可學秦  
記向來無貧賤常甘分崇高不解腴雖然門館隔泣

與衆人殊疑碧雲騏一書真出聖俞合而觀之聖俞  
之為人可知歐公待之最為得體

董故立  
四人一層

# 送徐無黨南歸序

草木鳥獸之為物衆人之為人其為生雖異而為死則  
同一歸於腐壞漸盡泯滅而已而衆人之中有聖賢者  
固亦生且死於其間而獨異於草木鳥獸衆人者雖死  
而不朽逾遠而彌存也其所以為聖賢者修之於身施  
之於事見之於言是三者所以能不朽而存也修於身  
者無所不獲施於事者有得有不得焉其見於言者則  
又有能有不能也施於事矣不見於言可也自詩書史

記所傳其人豈必皆能言之士哉修於身矣而不施於事不見於言亦可也孔子弟子有能政事者矣有能言語者矣若顏回者在陋巷曲肱饑臥而已其羣居則默然終日如愚人然自當時羣弟子皆推尊之以為不敢望而及而後世更百千歲亦未有能及之者其不朽而存者固不待施於事況於言乎予讀班固藝文志唐四庫書目見其所列自三代秦漢以來著書之士多者至百餘篇少者猶三四十篇其人不可勝數而散亡磨滅



百不一二存焉予竊悲其人文章麗矣言語工矣無異  
草木榮華之飄風鳥獸好音之過耳也方其用心與力  
之勞亦何異衆人之汲汲營營而忽焉以死者雖有遲  
有速而卒與三者同歸於泯滅夫言之不可恃也蓋如  
此今之學者莫不慕古聖賢之不朽而勤一世以盡心  
於文字間者皆可悲也東陽徐生少從予學為文章稍  
稍見稱於人既去而與羣士試於禮部得高第由是知  
名其文辭日進如水涌而山出予欲推其盛氣而勉其

思也故於其歸告以是言然予固亦喜為文辭者亦因以自警焉

王志堅曰張芸叟與石司理書云頃遊京師每聽歐陽文忠公王荊公司馬溫公之論於行義文史為多惟歐公多談吏事久之不免有請云學者之見先生莫不以道德文章為欲聞者今先生多教人以吏事所未喻也公曰不然吾子異日臨事當自知之大抵文章止於潤身政事可以及物吾昔貶官夷陵欲求

史漢一觀公私無有因取陳年公牘反覆觀之見其枉直乖錯不可勝數且以夷陵荒遠編小尚如此天下固可知也當時仰天誓心曰自爾遇事不敢忽也迨今二十餘年出入中外忝塵三事今日以人望我必謂翰墨致身以我自觀竟是當時一言之報也此序諄諄以徒言為誠即此一段公於文學曾不自足而必求政事以及人非聖賢心事何以有此

御選唐宋文醇卷二十四

欽定四庫全書

御選唐宋文醇卷二十五目錄

廬陵歐陽修文四

序 策問 論

送王聖紀赴扶風主簿序

送田畫秀才寧親萬州序

送楊寘序

送王陶序

問進士策一

問進士策

四首  
之四

泰誓論

本論

欽定四庫全書

御選唐宋文醇卷二十五

廬陵歐陽修文四

送王聖紀赴扶風主簿序

前年五月大霖雨殺麥河溢東畿浸下田已而不雨至  
於八月菽粟死高田三司有言前時溢博州民冒河為  
言得免租者蓋萬計今歲秋當租懼民幸水旱因緣得  
妄免以虧兵食慎敕有司謹之朝廷因舉田令約束州

縣吏吏無遠近皆望風惡民言水旱一以農田敕限甚  
者笞而絕之畿之民訴其縣不聽則訴於開封又不聽  
則相與聚立宣德門外訴於宰相於是遣吏四出視諸  
縣視者還而或言災或言否然言否者十七八最後視  
者還言民實災而吏徒畏約束以苟自免爾天子聞之  
惻然盡蠲畿民之租余嘗竊歎曰民生幸而為畿民有  
緩急近而易知也雨降於天河溢於地與赤日之出是  
三者物之易見也前二三歲旱蝗相連朝廷歲歲隨其



災之厚薄蠲其賦之多少至兵食不足則歲糴或入粟以爵而充之是在上者之愛人而仁人之心易惻也以易知之近言易見之事告易惻之仁然吏一壅之幾不得達况四海之大幾萬里而遠事之難知不若霖潦赤日之易見者何數使上有惻之之心不得達於下有思告之苦不得通於上者吏居其間而壅之爾可勝歎哉扶風為縣限關之西距京師在千里外民之不幸而事有隱畏者何限其能生死曲直之者令與主簿尉三

人而民之志得不壅而聞於州州不壅而聞於上縣不壅而民志通者令與主簿尉達之而已王君聖紀主簿於其縣聖紀好學有文佐是縣也始試其為政焉故以夫素所歎者告之景祐三年二月二十四日廬陵歐陽修序

秦二世時山東郡縣少年苦秦吏皆殺其守尉令丞反以應陳涉相立為侯王合從西鄉名為伐秦不可勝數也謁者使東方來以反者聞二世二世怒下吏後使者

至上問對曰羣盜郡守尉方逐捕今盡得不足憂上悅  
及閭樂至望夷宮射及幄幃二世怒召左右左右惶擾  
不闕旁有一宦者侍不敢去二世謂曰公何不蚤告我  
乃至於此宦者曰臣不敢言故得全使臣蚤言皆已誅  
安得至今嗟夫古先哲王使公卿至於列士獻詩瞽獻  
典史獻書師箴瞍賦矇誦工諫庶人傳語近臣盡規親  
戚補察夫人情莫不好譽而惡毀古先哲王亦人耳必  
欲盡小人怨汝詈汝之聲交至於耳且皇自敬德厥愆

曰朕之愆不啻不敢含怒豈非布衣之所不能堪者哉  
凡以位愈高則蔽愈衆且遠或望風而戰栗或望風而  
希旨以其一喜則萬利集一怒則萬苦聚人安得不唯  
喜之冀而唯怒之懼於是有所可以得喜者無不為也有  
可以得怒者無不避也是故下愈巧而上愈闇下愈黨  
而上愈孤上孤且闇則百姓無可告訴而小人在位愈  
益得志社稷危於累卵若秦二世矣易曰豐其屋蔀其  
家闕其戶闕其無人三歲不覿凶此之謂也夫秦二世

者與桀紂比蹤者也後世人主言及二世事則曰是安得復見於今也今觀修所言乃宋仁宗時事仁宗之與二世相去天淵不可以道里計而一有懼民幸水旱因緣得免租之見則畿內之近民有災而不得聞遣吏四出而歸言無災者十七八矣仁宗雖終不為二世而秦時謁者何難復生於景祐間哉人主奈何不懼懼之若何曰謹好惡而已矣



送田畫秀才寧親萬州序

五代之初天下分為十三四及建隆之際或滅或微其在者猶七國而蜀與江南地最大以周世宗之雄三至淮上不能舉李氏而蜀亦恃險為阻秦隴山南皆被侵奪而荆人縮手歸峽不敢西窺以爭故地及太祖受天命用兵不過萬人舉兩國如一郡縣吏何其偉歟當此時文初之祖從諸將西平成都及南攻金陵功最多於時語名將者稱田氏田氏功書史官祿世於家至今而

不絕及天下已定將率無所用其武士君子爭以文儒  
進故文初將家子反衣白衣從鄉進士舉於有司彼此  
一時亦各遭其勢而然也文初辭業通敏為人敦潔可  
喜歲之仲春自荆南西拜其親於萬州維舟夷陵予與  
之登高以遠望遂遊東山窺綠蘿溪坐盤石文初愛之  
留數日乃去夷陵者其地志云北有夷山以為名或曰  
巴峽之險至此地始平夷蓋今文初所見尚未為山川  
之勝者由此而上沂江湍入三峽險怪奇絕乃可愛也



當王師伐蜀時兵出兩道一自鳳州以入一自歸州以取忠萬以西今之所經皆王師嚮所用武處覽其山川可以慨然而賦矣

此篇與豐樂亭記同義俯仰百年間想創業之艱難識治平之有由撫安樂之適時懼危亡之不戒期全孝於抒忠畏失義而離道種種具流露於意言之表

欽定四庫全書

卷二十五

七

送楊冥序

予嘗有幽憂之疾退而閒居不能治也既而學琴於友人孫道滋受宮聲數引久而樂之不知疾之在其體也夫琴之為技小矣及其至也大者為宮細者為羽操絃驟作忽然變之急者淒然以促緩者舒然以和如崩崖裂石高山出泉而風雨夜至也如怨夫寡婦之歎息雌雄雍雍之相鳴也其憂深思遠則舜與文王孔子之遺音也悲愁感憤則伯奇孤子屈原忠臣之所歎也喜怒

哀樂動人必深而純古淡泊與夫堯舜三代之言語孔  
子之文章易之憂患詩之怨刺無以異其能聽之以耳  
應之以手取其和者道其湮鬱寫其幽思則感人之際  
亦有至者焉予友楊君好學有文累以進士舉不得志  
及從廕調為尉於劍浦區區在東南數千里外是其心  
固有不平者且少又多疾而南方少醫藥風俗飲食異  
宜以多疾之體有不平之心居異宜之俗其能鬱鬱以  
久乎然欲平其心以養其疾於琴亦將有得焉故予作

琴說以贈其行且邀道滋酌酒進琴以為別

古之善言琴者惟韓退之聽穎師彈琴詩然未免三分  
琵琶七分箏之誚若此文與枚乘七發中龍門之桐高  
百尺而無枝一篇便真有琴聲出於紙上



送王陶序

六經皆載聖人之道而易著聖人之用吉凶得失動靜  
進退易之事也其所以為之用者剛與柔也乾健坤順  
剛柔之大用也至於八卦之變六爻之錯剛與柔迭居  
其位而吉亨利无咎凶厲悔吝之象生焉蓋剛為陽為  
德為君子柔為陰為險為小人自乾之初九為姤而上  
至於剝其卦五皆陰剝陽之卦也小人之道長君子靜  
以退之時也自坤之初六為復而上至於夬其卦五皆

剛決柔之卦也。小人之道消。君子動以進而用事之時也。夫剛之為德。君子之常用也。庇民利物功莫大焉。其為卦過泰之三而四為大壯。五為夬。壯者壯也。夬者決也。四陽雖盛而猶有二陰。然陽衆而陰寡則可用壯以攻之。故其卦為壯。五陽而一陰。陰不足為直。可決之而已。故其卦為夬。然則君子之用其剛也。審其力視其時。知陰險。小人之必可去。然後以壯而決之。夫勇者可犯也。彊者可誣也。聖人於壯決之用必有戒焉。故大壯之



象辭曰大壯利貞其象辭曰君子非禮勿履夬之象辭  
曰健而說決而和其象辭曰居德則忌以明夫剛之不  
可獨任也故復始而亨臨浸而長泰交而大壯以衆攻  
其寡夬乘其衰而決之夫君子之用其剛也有漸而不  
失其時又不獨任必以正以禮以說以和而濟之則功  
可成此君子動以進而用事之方也太原王陶字樂道  
好剛之士也常嫉世陰險而小人多居京師不妄與人  
遊力學好古以自信自守今其初仕於易得君子動以

進之象故予為剛說以贈之大壯之初九曰壯於趾征  
凶夬之初九亦曰壯於趾往不勝為咎以此見聖人之  
戒用剛也不獨於其象象而又常深戒於其初嗚呼世  
之君子少而小人多君子力學好剛以蓄其志未始施  
之於事也今其往尤宜慎乎其初

王陶為御史力攻富弼其人正子貢所惡以不孫為勇  
以計為直者歟修於其筮仕時為述大易剛德之善以  
戒之蓋蚤有以識其心也其言君子之用剛也有漸而

不失其時又不獨任必以正以禮以說以和而濟之誠  
有得夫天德不為首之旨先聖之微言大義具於此矣  
雖然若王陶者何足以語此黨小人害君子正是陰柔  
非剛也所為惡積而不可掩者也若夫壯趾壯頰猶君  
子也公私善惡之不同由其發心之始已如秦越焉若  
王陶者擬之於易其為羸豕孚蹢躅乎



問進士策一

問六經者先王之治具而後世之取法也書載上古春秋紀事詩以微言感刺易道隱而深矣其切於世者禮與樂也自秦之焚書六經盡矣至漢而出者皆其殘脫顛倒或傳之老師昏耄之說或取之冢墓屋壁之間是以學者不明異說紛起況乎周禮其出最後然其為書備矣其天地萬物之統制禮作樂建國君民養生事死禁非道善所以為治之法皆有條理三代之政美矣而

周之治迹所以比二代而尤詳見於後世者周禮著之故也然漢武以為瀆亂不驗之書何休亦云六國陰謀之說何也然今考之實有可疑者夫內設公卿大夫士下至府史胥徒以相副貳外分九服建五等差尊卑以相統理此周禮之大畧也而六官之屬畧見於經者五萬餘人而里閭縣鄙之長軍師卒伍之徒不與焉王畿千里之地為田幾井容民幾家王官王族之國邑幾數民之貢賦幾何而又容五萬人者於其間其人耕而賦

乎如其不耕而賦則何以給之夫為治者故若是之煩  
乎此其一可疑者也秦既誅古盡去古制自漢以後帝  
王稱號官府制度皆襲秦故以至於今雖有因有革然  
大抵皆秦制也未嘗有意於周禮者豈其體大而難行  
乎其果不可行乎夫立法垂制將以遺後也使難行而  
萬世莫能行與不可行等爾然則反秦制之不若也脫  
有行者亦莫能興或因以取亂王莽後周是也則其不  
可用決矣此又可疑也然其祭祀衣服車旗似有可采

者豈所謂郁郁之文乎三代之治其要如何周禮之經其失安在宜於今者其理安從其悉陳無隱

修言用周禮以致亂者王莽後周而王安石之亂宋即  
在同時修為策問已見其端而為是說邪抑偶合邪修  
知貢舉時安石之禍未熾也周禮一書宋儒終不敢直  
以為非周公所作或言王莽時劉歆偽撰篇章篡入之  
以媚新室俾其虐政若出周公之舊典者而禮家斷斷  
以為不可今觀修文核計六官之屬五萬餘人而無員



願者尚不在內乃欲以千里之地供其祿糈則實勢所  
必無矣顧修所疑猶為舉其小而遺其大也夫聖王之  
治天下養人為大書曰厚生易曰損上益下詩刺萑楚  
春秋譏稅畝孔子曰富之孟子曰薄稅斂大學曰財聚  
則民散凡六經四子之書所以教萬世之帝王公卿大  
夫至於師長百執事者莫此為先焉蓋天生貴者所以  
養賤者也天生富者所以養貧者也此天地之性也聖  
賢之所以為聖賢由欲利民也經書之所以為經書由

欲垂利民之典則於萬世也今觀周禮司市質人廛人肆長泉府司門司關山虞林衡川衡澤虞迹人州人角人羽人掌葛掌染掌荼掌蜃之屬舉市廛門關山林川澤所有鳥獸魚鼈草木玉石一切貨賄之屬莫不設之厲禁而盡征之入市有稅入門有稅入關有稅避而不入即沒入之地所從產又官守而以時入之甚至民有稱貸又官取其息不如禁者執而誅罰之如是則天之所生地之所長人之所養俱入朝廷不留一絲毫之遺

利以與民矣雖王莽之虐恐其力亦不能悉如書中之  
所載以盡行其厲民之事也而謂周公為之乎若夫有  
天地而後有萬物有萬物而後有男女有男女而後有  
夫婦中庸曰造端乎夫婦夫婦誠人道之始也今周禮  
媒氏曰中春之月會男女於是時也奔者不禁若無故  
而不用令者罰之又曰司男女之無夫家者而會之如  
是則是設之官立之禁驅天下女子之未有夫者必奔  
而夫死者必嫁也誠何心哉其他瑣細不具論即此二

大端在上者雖有闕睢麟趾之意又如之何其可行邪  
由此觀之即使周公果有是書亦已不傳於後世孟子  
不云乎諸侯惡其害已也而皆去其籍豈孟子時已無  
其籍而今日猶有全書邪縱使尚有斷簡殘編之沒於  
莽穢榛雜中者非聖人復起其孰能辨之然則或謂劉  
歆媚莽所作者似亦十得六七也

問進士策

問古之取士者上下交相待以成其美今之取士者上下交相害欲濟於事可乎古之士教養有素而進取有漸上之禮其下者厚故下之自守者重上非厚禮不能以得士士非自重不能以見禮於上故有國者設爵祿車服禮樂於朝以待其下為士者修仁義忠信孝悌於家以待其上設於朝者知下之能副其待則愈厚居下者知上之不薄於已故愈重此豈不交相成其美歟後

世之士則反是上之待其下也以為干利而進爾雖有爵祿之設而日為之防以革進之濫者下之視其上也以為雖自重上孰我知不自進則不能以達由是上之待其下也益薄下之自守者益不重而輕嗚呼居上者欲得其人在下者欲行其道其可得邪原夫三代取士之制如何漢魏迨今其變制又如何宜歷道其詳也制失其本致其反古當自何始今之士皆學古通經稍知自重矣而上之所以禮之者未加厚也噫由上之厚然

後致下之自重歟必下之自重然後上禮之厚歟二者  
兩不為之先其勢亦奚由而合也宜具陳其本末與其  
可施於今者以對

學校之教不逮於古而取士無長策矣其上下交相失  
之故具見於篇蓋千古賢君志士之所同慨也





泰誓論

書稱商始咎周以乘黎乘黎者西伯也西伯以征伐諸侯為職事其伐黎而勝也商人已疑其難制而惡之使西伯赫然見其不臣之狀與商並立而稱王如此十年商人反晏然不以為怪其父師老臣如祖伊微子之徒亦默然相與熟視而無一言此豈近於人情邪由是言之謂西伯受命稱王十年者妄說也以紂之雄猜暴虐嘗醢九侯而脯鄂侯矣西伯聞之竊歎遂執而囚之幾

不免死至其叛已不臣而自王乃反優容而不問者十年此豈近於人情邪由是言之謂西伯受命稱王十年者妄說也孔子曰三分天下有其二以服事商使西伯不稱臣而稱王安能服事於商乎且謂西伯稱王者起於何說而孔子之言萬世之信也由是言之謂西伯受命稱王十年者妄說也伯夷叔齊古之知義之士也方其讓國而去顧天下皆莫可歸聞西伯之賢共往歸之當是時紂雖無道天子也天子在上諸侯不稱臣而稱

王是僭叛之國也然二子不以為非依之久而不去至武王伐紂始以為非而棄去彼二子者始顧天下莫可歸卒依僭叛之國而不去不非其父而非其子此豈近於人情邪由是言之謂西伯受命稱王十年者妄說也書之泰誓稱十有一年說者因以謂自文王受命九年及武王居喪二年并數之爾是以西伯聽虞芮之訟謂之受命以為元年此又妄說也古者人君即位必稱元年常事爾不以為重也後世曲學之士說春秋始以改

元為重事然則果常事歟固不足道也果重事歟西伯即位已改元矣中間不宜改元而又改元至武王即位宜改元而反不改元乃上冒先君之元年并其居喪稱十一年及其滅商而得天下其事大於聽訟遠矣又不改元由是言之謂西伯以受命之年為元年者妄說也後之學者知西伯生不稱王而中間不再改元則詩書所載文武之事粲然明白而不誣矣或曰然則武王畢喪伐紂而秦誓曷為稱十有一年對曰畢喪伐紂出於

諸家之小說而泰誓六經之明文也昔者孔子當衰周之際患衆說紛紜以惑亂當世於是退而修六經以爲後世法及孔子既歿去聖稍遠而衆說復興與六經相亂自漢以來莫能辯正今有卓然之士一取信乎六經則泰誓者武王之事也十有一年者武王即位之十有一年爾復何疑哉司馬遷作周本紀雖曰武王即位九年祭於文王之墓然後治兵於孟津至作伯夷列傳則又載父死不葬之說皆不可爲信是以吾無取焉取信

於書可矣

乍讀斯論一則曰妄說再則曰妄說更三四稱而不止  
若言之無文者繹思之而後知其用意也無逸曰文王  
受命惟中身蓋由武王已得天下之後而推本言之耳  
周公若曰當文王之中年已可朝諸侯有天下而不改  
臣節文王所以為至德也文王非不能得天下而必待  
武王也孔子亦曰三分天下有其二以服事殷周之德  
其可謂至德也已矣後世不察轉因受命惟中身一語

而謂文王有滅商之心且顯有叛商之迹推其年歲當  
在戡黎之時遂謂其時西伯稱王改元武王本文王之  
志以伐商即位不改元而於泰誓之十有三年譟解紛  
紘曹操司馬懿遂有吾其為周文王之語經之不明人  
倫之大患修既確見其妄辭而闢之應不遺餘力故不  
惜言重辭複為斬斬斷斷之辭凡以明人倫云爾





本論

天下之事有本末其為治者有先後堯舜之書畧矣後世之治天下未嘗不取法於三代者以其推本末而知所先後也三王之為治也以理數均天下以爵地等邦國以井田域民以職事任官天下有定數邦國有定制民有定業官有定職使下之共上勤而不困上之治下簡而不勞財足於用而可以備天災也兵足以禦患而不至於為患也凡此具矣然後飾禮樂興仁義以教道

之是以其政易行其民易使風俗淳厚而王道成矣雖有荒子孱孫繼之猶七八百歲而後已夫三王之為治豈有異於人哉財必取於民官必養於祿禁暴必以兵防民必以刑與後世之治者大抵同也然後世常多亂敗而三王獨能安全者何也三王善推本末知所先後而為之有條理後之有天下者孰不欲安且治乎用心益勞而政益不就認認然常恐亂敗及之而輒以至焉者何也以其不推本末不知先後而已今之務衆矣所

當先者五也其二者有司之所知其三者則未之思也  
足天下之用莫先乎財繫天下之安危莫先乎兵此有  
司之所知也然財豐矣取之無限而用之無度則下益  
屈而上益勞兵強矣而不知所以用之則兵驕而生禍  
所以節財用兵者莫先乎立制制已具備兵已可使財  
已足用所以共守之者莫先乎任人是故均財而節兵  
立法以制財任賢以守法尊名以厲賢此五者相為用  
有天下者之常務當今之世所先而執事者之所忽也

今四海之內非有亂也上之政令非有暴也天時水旱非有大故也君臣上下非不和也以晏然至廣之天下無一間隙之端而南夷敢殺天子之命吏西夷敢有崛強之王北夷敢有抗禮之帝者何也生齒之數日益衆土地之產日益廣公家之用日益急四夷不服中國不尊天下不實者何也以五者之不備故也請試言其一  
二方今農之趣耕可謂勞矣工商取利乎山澤可謂勤矣上之徵賦權易商利之臣可謂纖悉而無遺矣然一

遇水旱如明道景祐之間則天下公私乏絕是無事之  
世民無一歲之備而國無數歲之儲也以此知財之不  
足也古之善用兵者可使之赴水火今廂禁之軍有司  
不敢役必不得已而暫用之則謂之借倩彼兵相謂曰  
官倩我而官之文符亦曰倩夫賞者所以酬勞也今以  
大禮之故不勞之賞三年而一徧所費八九百萬有司  
不敢緩月日之期兵之得賞不以無功知愧乃稱多量  
少比好嫌惡小不如意則羣聚而呼持挺欲擊天子之

大吏無事之時其猶若此以此知兵驕也夫財用悉出而猶不足者以無定數也兵之敢驕者以用之未得其術以此知制之不立也夫財匱兵驕法制未一而莫有奮然忘身許國者以此知不任人也不任人者非無人也彼或挾材蘊知特以時方惡人之好名各藏畜收斂不敢奮露惟恐近於名以犯時人所惡是以人人變賢為愚愚者無所責賢者被譏疾遂使天下之事將弛廢而莫敢出力以為之此不尚名之弊者天下之最大患

也故曰五者之皆廢也前日五代之亂可謂極矣五十三年之間易五姓十三君而亡國被弑者八長者不過十餘歲甚者三四歲而亡夫五代之主豈皆愚者邪其心豈樂禍亂而不欲為久安之計乎顧其力有不能為者時也當是時也東有汾晉西有岐蜀北有強胡南有江淮閩廣吳越荆潭天下分為十三四面環之以至狹之中國又有叛將強臣割而據之其君天下者類皆為國日淺威德未洽強君武主力而為之僅以自守不


幸孱子懦孫不過一再傳而復亂敗是以養兵如兒子之啖虎狼猶恐不為用尚何敢制以殘弊之民人瞻無貨之征賦頭會箕斂猶恐不足尚何曰節財以富民天下之勢方若敝廬補其輿則隅壞整其桷則棟傾枝撐扶持苟存而已尚何暇法象規圓矩方而為制度乎是以兵無制用無節國家無法度一切苟且而已今宋之為宋八十年矣外平僭亂無抗敵之國內削方鎮無強叛之臣天下為一四海晏然為國不為不久天下不為



不廣也語曰長袖善舞多錢善賈言有資者其為易也  
方今承三聖之基業据萬乘之尊名以有四海一家之  
天下盡大禹貢賦之地莫不內輸惟上之所取不可謂  
乏財六尺之卒荷戈勝甲力穀五石之弩彎二石之弓  
者數百萬惟上制而令之不可謂乏兵中外之官居職  
者數千員官三班吏部常積者又數百三歲一詔布衣  
而應詔者萬餘人試禮部者七八千惟上之擇不可謂  
乏賢民不見兵革於今幾四十年矣外振兵武攘夷狄

內修法度興德化惟上之所為不可謂無暇以天子之  
慈聖仁儉得一二明智之臣相與而謀之天下積聚可  
如文景之富制禮作樂可如成周之盛奮發威烈以耀  
名譽可如漢武帝唐太宗之顯赫論道德可興堯舜之  
治然而財不足用於上而下已弊兵不足威於外而敢  
驕於內制度不可為萬世法而日益叢雜一切苟且不  
異五代之時此甚可歎也是所謂居得致之位當可致  
之時又有能致之資然誰憚而久不為乎

此文切中宋仁宗時政事之失漢之不復於三代人每  
為文景歎宋之遽衰於神哲人亦每為仁英惜蓋國無  
人焉孰與為理此雅詩所以頌美人君必以賢才衆多  
為辭蓋國家之福天地之祥誠莫大乎此也



御選唐宋文醇卷二十五